

Mundu ta Kaba!...(atrobe)

Segun un komunikado di e Federashon Galáktiko na Santiago di Chile, mundu lo kaba dia 16 di ougùstùs, nèt mitar síglo desde e bòmnan atómiko a ser tirá riba Hiroshima i Nagasaki. Segun profeta di e galáktikonan, Pacal Votan, e habitantenan di mundu tin solamente "52 dia di desishon" pa salba nan mes. E periodo aki a kuminsá dia 26 di yüni...50 dia falta!

Esaki no ta promé biaha ku un profesia asina a ser duná! En realidat, e ta solamente e último riba un lista largu di pronostikonan falsu. Indudabelmente mas "profesia" lo ser agregá na e lista...manera a sosodé último añanan.

Na aña 1992, Harold Camping a skirbi un buki entitulá *1994?* Deklarando ku mundu lo por kaba entre 15 i 17 di sèptèmber di e aña indiká pa su título.

Dia 28 di òktober 1992, den statnan rònt Sur Korea, siguidónan di e sekta Hyoo-go a advertí, "Mundu ta kaba awe nochi, 12 'or. Kere awor i lo bo ta salbá!"

Mil kreyente ansioso a reuni na un iglesia na Seoul e anochi ei antisipando Kristu Su binida. En preparashon pa e evento aki, vários dama a abortá nan beibi, pensando ku nan kurpa lo ta muchu pisá pa topa Kristu den laira. Algun a bandoná tur kos--kas, tereno, famia, kima muebel--djis pa e momentu aki.

Pafó di iglesia, miles di mirones curioso a djòin 1500 polis, 200 reshèrshi, ambulans, i trùk di bombero pa opservá. Tur tabata wak oloshi. Paden, siguidónan di e sekta, bistí na blanku, a hisa man na laira, nan kara bañá ku lágrima, sklamando na Dios, siguí pa kantamentu. Diesdos or a bati! Nada... Speransa a bira desapuntashon, yoramentu, i desilushon. Despues di 15 minüt, un líder a despídí e multitud. Kuater a kometé suisidio. Un miembro kibrá a deklará: "Dios a gaña nos."

Edgar Whitsenant su buki *88 Motibu ku Kristu Lo Bin Na Aña 1988* a hasi un furor entre evangélikonan. Segun su kalkulashon, Kristu por bin entre 11 i 13 di sèptèmber, armonisando ku un selebrashon hudiu, Fiesta di Ramada.

Testigunan di Jehova a kalkulá ku sèptèmber 1975 lo finalisá e era aktual i inisiá e di shete milenio desde kreashon. Ora nada a sosodé, nan a splika ku e lapso di tempu entre kreashon di Adam i Eva ta deskonosí. Na por lo ménos sinku okashon, e sekta aki a pone fecha pa un òf otro evento i a keda desapuntá.

Durante segundo guerra mundial, un grupo a bende nan poseshonnan, reuní riba un serito, i warda pa Dios skapa nan fo'i gara di e antikristu, Adolph Hitler.

For di su estudio di Beibel, William Miller a kalkulá na aña 1818 ku Kristu lo bolbe entre 21 mart, 1843 i 21 mart, 1844. Desapuntá, Samuel Snow a kalkulá un otro fecha, 22 òktober 1844. Kasi henter e grupo a bai su tras. Ora nan a keda ku man bashí atrope, hopi a bandoná nan fe, miéntras algun a forma otro gruponan, di kua Iglesia Atventista ta un.

Mas ehèmpel por ser duná. E lokura di fihamentu di fecha pa un òf otro evento profétiko a eksistí den tur era, hopi religion i sekta. Na lugá di keda un estudiante di profesia den Beibel, nan mes ke bira profeta!

Hesus sinembargu a desaprobá di tur ponementu di fecha ora El a bisa, "Ma dje dia, ni dje ora ei ningun hende no sabi nada, ni e angelnan di shelu, sino Mi Tata so" (Mateo 24:36). No bai tras di hende ku ta fiha fecha pa algu ku DIOS SO SA!

Ma di otro banda, no pensa ku e eventonan profetisá den Beibel nunca lo tuma lugá. E apòstel Pedro a advertí ku hende lo hasi cherchi di e profesianan den Beibel, "Den último tempunan lo bin bofonadó ku lo.. bisa..."Unda e promesa ku lo E bini ta? Pasobra di dia ku e tatanan a muri, tur kos ta keda manera nan tabata desde prinsipio di kreashon" (2 Pedro 3:3-4). Ma méskos ku Hesus Su nasementu, morto, i resurekshon a ser profetisá i kumplí, igualmente ta mes sigur ku e otro eventonan profetisá den Beibel lo sosodé.

Ora Hesus a subi na shelu, dos angel a deklará na e apòstelnan, "E Hesus aki ku a wòrdu tumá fo'i boso den shelu, lo bolbe méskos ku boso a mir'E bai" (Echunan 1:11). Maske e fecha ta deskonosí, echu ta ku Kristu por bin na kualke momentu; i pasobra esaki por sosodé na KUALKE momentu, nos mester ta prepará TUR momentu!